

華

陽

集

華

華陽集卷三十一

宋

王

珪

撰

外制

前宰相龐籍封贈制

祖贈太師文進追封榮國公

祭者必有惠術以及其下蓋神明薦釐非可專己之饗
故朕竣祠于郊澤漏淵泉眷維舊政之良率義至祖而
申閔穉之冊者不曰寵數之隆乎具官某祖某履道外
坦棲志中恬有陰施之滴而載之當時有燕裕之謀而

啓厥來緒孝孫維德嘗冠台衡慶緣上帝之禋錫用文
人之鬯榮國之履胙以公主載琢之璋永賁幽隧

祖母陳氏追封秦國太夫人

朕饗成于郊澤究于下眷言宰路之舊永惟親廟之奉
蓋本天而事地則神道通因祖而及配則人倫順更飭
閔典以隆先慈具官某祖母某氏幽閒有儀惠淑本性
闡教經于二物嬪風茂于六嫔叢然墮祥載葉而熾講
吉土之嚴配漏重泉之渥恩脂川易封秦疆爲大重軒
累襪寵于幽局

父贈太師令格追封徐國公

朕惟三代禮樂之制邈乎不可及已然國家休寧天地
右序祖功宗德爛然更新非夫闡郊廟之歌以揚休于
無窮則何以美民耳目于天下哉朕前勅有司攷正大
典孝奏之夕神光交錯亦惟我內外輔賢協共同德胥
暨將子于成今逆神釐旣首敷于有位加用閔冊以褒
爾先正之官具官某父某識厚器宏舊有令聞材屈諸
用仕僅止于庠秩慶流厥後譽遂侈于子舍惟藉寅亮
一德作予股肱今保釐東藩而迺心不忘在王室是非

華陽集 卷三 二命廷倫校
保先訓之篤哉茲庸上公爵土綈爾于九京之路冥漠
奚之尚歆予之嘉命

母邢氏追封齊國太夫人

朕惟人子事親之難也羶薌而薦之非孝也惟國人之
稱曰有子如此茲可謂之孝歟今夫老成人夙懋乃德
固嘗坐廟堂之上從容嘉論以經綸四海之治者豈特
國人之稱哉非因郊休成以厚顯親之典曷以慰其永
思具官某母某氏賢明靖恭君子之配春秋承祀不懈
益虔嬪風穆如孰不嗟尚古者有象服之飾自綸翟而

下其制蓋尊朕既已追榮之今予均邦之釐又疏命爾
國則莫如齊大爾尚嘉慰于新邑其亦右乃後永孚于
休

樞密副使王堯臣封贈制

祖礪贈太師

朕以天元穀旦有事于郊尊祖嚴父以配上帝躬繹孝
思不顯維烈眷予左右秉德之臣夙夜在祀豈不有霜
露之感乎具官某祖某識鄰于幾材裕于劇奧文蹈于
聖域碩望端于朝倫賢生乃孫祗輔台德方丕纘于機

務屬熙成于禮典策以帥垣之峻襜之公裘之華其趣
篆章以渙幽安

父瀆贈太子太師

夫爲人子者莫不欲顯其親于時若夫從容廟堂之上
而與籌天下者是豈不足昭前人之光耶朕因郊饗親
又加賁其私廟則忠孝之寵宜以交勉于廟廷之臣具
官某父某蓄德純明稟識宏厚有英佐之畧而僅止外
廷之祿有美利之澤而不及萬物之施慶靈回復似續
世昌有子忠賢在朕左右相維紫營之祀漏及重泉之

渥儲師之轍寵冠近班嶽音遐假歆此嘉數

母仇氏追封南陽郡太夫人

朕讀蓼莪之詩有昊天罔極之報者其人子念親之至
者歟若夫累茵列鼎享王爵之貴而親不及養者非登
柄受寵因郊粢慶則何以慰其孝心哉具官某母某氏
柔明懿恭四德畢懋奉尊法度格于有家慶祥之叢遂
侈厥後惟堯臣秉朕機務而忠規密謨日緝熙于朝廷
肆予大賚于天下惟爾教子之賢可不厚褒乎象服雕
軒載裂名壤納書于襪永以爲渙

親姑王氏封壽安縣太君

朕迺者大報于郊遭天地施集丕福亦維爾烈文辟公
顯相子成朕布大慶于天下若爾私門之渙豈茲後乎
某氏生于名緒婉有儀德爾夫刻志辭業命不時偶迺
兄弟之子實筦予之機政今願還壺中之澤以君爾大
邑蓋寵足以華族而孝足以厚親朕可拒乎其綏爾壽
康以對予之嘉命

使相韓琦封贈制

祖母李氏追封安平郡太夫人

朕遭天地況施懼德之弗承迺吉已親執珪幣大報于
郊神人祇歡百嘉順嚮瞻吾碩輔本兵于邊曾是貢職
之勤將予肆祀今其漏澤于天下盍先私廟之恤哉具
官某祖母某氏教自公宮儀于清闕春秋承祀不懈益
虔惠問川流慶馳于後有孫賢令忠勞王家適蠲禮成
加謚名壤雕軒翟第賁于幽局

母羅氏追封文安郡太夫人

母胡氏追封河東郡太夫人

朕惟王者大孝之本莫若虔天地之奉然祭不欲數故

三歲而躬行之以明得禮之中迺景至之吉肆禋于郊
璧玉華光竽瑟和鬯靈游來下虞樂紫壇百嘉穰穰靡
不順嚮眷維同德之臣賦政于外方予升配三后雖不
得預于邊俎豈不與念親之感乎具官某母某氏法度
雍柔稟有賢德善祥之滴哲嗣其興曩以琦珍參秉機
務加爾以小君之襁今竣漏澤相攸于蒲益大湯賦之
封九泉雖幽固亦歆朝寵之厚其不顯歟

妻崔氏進封樂安郡夫人

朕執鬯于清廟奠玉于崇丘思廣禋燔之釐均優將鉞

之輔外以錫命書之贊以敷于明廷內則易望郡之腴
以褻爾令室萃爲蕃數交渙高門具官某妻某氏本德
閎之英啟賢緒之範日鑒女圖之訓時承宗饗之寅眷
茲蕃政之良繫迺梱儀之助比從大用已卽敦封適涓
熙事之成更侈小君之號脂田裂于名壤翟茀朝于內
庭綸章之華思茂爾止

翰林學士承旨王拱辰封贈制

父代恕贈刑部侍郎

朕攬成周之頌莫隆天地之祠采盛漢之歌未有祖宗

之事迺郊陟三后以詠功德之休又賡延羣神以合福
瑞之況舉天下以漏其澤思孝子之篤于親具官某父
某行積于躬材屈諸用陰滴當代之施善啓後昆之祥
生子峻賢冠予禁近侍嚴配于禮士興孝思于禰宮進
貳天臺之卿往詔泉夕之路尙期放憇來顧寵靈

母李氏追封延安郡太君

朕執鬯于太室奠玉于崇丘禮鉅而文繁誠交而福浸
睠惟近署之冠參領使儀之聯疇侍祠之勞則頒賦明
勲以大予德施廣錫類之孝則裂封加祿以隆爾親慈

叢厥寵靈貫于幽顯具官某母某氏履高明之行敷淑
惠之風法度宜于有家慶祥侈于厥後維子茂器時吾
名臣肆欽燎之竣祠漏重泉而疏渥載易大邦之服永
孚幽安之光庸慰時思式旌厚訓

母趙氏追封永安郡太君

夫人子之于親也生則欲致其養沒則追榮之何可已
耶方朕欽柴于郊對越三后厥有秉文之臣夙夜在祀
顧不興霜露之怛乎具官某母某氏肅恭賢明四德純
茂奉承祭祀不懈益虔實生令子冠予禁署慈訓之邈

不見其榮載荒大都以厚湯賦閔章加祿庸繹孝思

觀文殿學士王舉正封贈制

父化基追封冀國公

朕讀緇衣見鄭武公世職于周國人宜之以其有善善之功者豈特父子之美耶抑明國家有好賢之風歟方予徹祠于郊冒天下以福捲維股肱之良世載令德既加寵于厥躬又用閔冊以追顯其先烈夫豈下詩人之作耶具官某父某器閎識廣謀合大猷自昔長憲府預機政固已熙事功于當時肆爾子以高文遠業輔朕忠

勞而歷職之顯一皆爾舊何其世閥之盛哉曩予祿爾以二省之令今茲開府與三公等儀固屬名數之常履聲何之尚歆予之嘉命

母宋氏追封秦國太夫人

夫古者治國無二道要之大義以磯天下之孝者非親親之謂歟然聖人善推其所爲以及于衆故愛其親者則必念人之親矣朕已巳日至禮于崇丘欽惟我一祖二宗之靈以配上帝豈曰能饗實報之盡時吾烈文之臣固亦怵霜露之履不頌閔書奚以慰其永思具官某

母某氏法度雍穆作配名門母儀之賢範于當世猗歎
有子列子碩輔慈訓之邈不見其榮再荒全秦大雨封
國重軒累祿永以爲渙

殿前都指揮使許懷德封贈制

曾祖秉贈太子太保

祭者必有惠術以及其下蓋神明薦釐非可專已之饗
故朕竣祠之始澤漏淵泉眷維將臣裒及三世之廟者
厥惟寵數之隆乎具官某曾祖某履道外坦棲志中恬
有陰施之蓄而載之當時有燕裕之謀而啓厥來緒維

孫之傑統于親軍慶緣上帝之禋錫用文人之鬯東儲
之傅秩重德尊載琢之章永賁幽隧

父均贈太尉

夫萬物裕于天地而生成之施無以云報者其猶子之
于親歟方子大旅于郊陟配三后而孝德孚于天下眷
吾武烈之臣時亦愴親庭之養不頒閱書奚以慰其永
思具官某父某器節沈雄志懷凌邁詩書輔于戎畧介
馬勤于邊衝生子傑材總兵在衛欽柴終于當時裒祿
加于禰宮登晉三公之崇追榮九京之路慶靈之會洵

有後哉

贈團練使何宗封贈制

父均千牛衛將軍致仕

朕維南征之際仗節之士其趨赴死難者固已追寵之
又思褒其親以錫忠孝之類某父憑德之厚克生俊臣
分提王師以靖蠻孽而遭命遇害悼于予聞眷爾衰年
創深子舍特陞環尹之列且慰下泉之思哀榮之隆尚
體予恤

母太原縣君王氏封太原郡君

夫爲人母者靡不欲其子之有聞于時若捐軀萬里蹈
于忠義之途者此今昔所褒雖沒其猶榮乎某母某氏
慶閭之賢實生良嗣毅然秉節期掃弗庭力敵摧堅至
于被害親慈之念予懷與均特疏列郡之封庸慰幽局
之慕愍存旌往寵于忠門

妻河南縣君宋氏封河南郡君

國家念勞之典無所私恤遺之禮靡不致蓋于國事之
報盡則其私門之澤深某妻某氏秉婦德儀勉夫忠義
載惟死節之際方深晝哭之哀疏封郡田慰念泉夕存

者被渥沒其有知

刑部郎中楊紘父億贈右僕射制

朕南面而聽孚孝德于天下邈然有思及人之先維爾子秉德之懿揚于外廷肆予攷邃古祇事于郊廟又有述職相祀之勤得非教忠使然耶詩不云乎無德不報朕誠不愛厚爵今有以追寵之慰若干下泉將使在位者益戴吾賜交懋于迺心亦所以廣忠孝之路也爾其歆承之

國子博士晁仲蔚父宗懋贈尚書右僕射制

朕荷上帝右序夙夜而不敢康乃飭躬齋戒己巳拜覬于郊對越三后禮成休明睠予朝闈之彥外有獻力之敏亦思所以顯其親者豈不望澤于茲乎具官某父某道醇德正國之寶臣文章鼓于訓言猷爲灼乎事典昔予命以機政之貳而緝熙百度沆臻平富之風嗟哉云亡莫究其用文昌右相師長百寮今而禔之亦惟爾有子之慶九原雖邈丕顯其承

虞部員外郎晁仲蔚封贈制

父宗懋贈尚書左僕射

朕惟王者大孝之本莫若虔天地之報然祭不欲其數也必三歲而躬行之朕前詔有司崇禮嚴配孝奏之夕神光交錯時惟我在廷之賢夙夜將予于成今竣祠逆釐霈其澤天下維爾先正之烈可追榮之後乎具官某父某天資忠厚九德兼懋履顯臨劇誠發事舒朕方倚乎機柄而在職日淺不究遠圖興言及茲悼嗟靡已其以文昌左相詔位于家匪特旌舊政之德亦幾昭哲嗣之慶爾尚歆承之

母王氏追封懷德郡太夫人

甚矣爲人子之難也羶薌而薦之非孝也惟國人稱之曰有子如此茲可謂之孝矣矧夫賢者之後以材爲郎溫清有儀不墜先訓肆予祗大事又有相祀之敏夫豈不揚親慈之懿乎具官某母某氏毓自清門配于高緒春秋承祀不懈益虔嬪風惠柔孰不宗仰鄉繇夫貴固已膺象服之寵今令子在廷講予逆釐又追荒于爾土尙慰安于新邑益佑迺後于休

三司使禮部侍郎田況封贈制

祖行周贈工部員外郎

朕承神之尊以反物始之報迺己巳景至帝臨中壇神靈冥娛光照紫幄對越三后孝心永孚亦惟爾一二侍從之臣相祠在下而霜露之怛可不慰爾之思今加祿二廟厥惟寵數之隆具官某祖某風德修潔行義沖固懷材弗耀載世而昌孝孫維賢筦我邦計夫道隆者其爵重積厚者其澤深文昌起司賁以優秩九原雖邈不顯其承

祖母王氏追封太原郡太君

朕惟泰元至尊所以本萬物之命無以稱其德故三歲

一祀以嚴大報之意朕奉承丕業躬執瑄幣以交天神之和豈非左右峻髦之臣秉德以陪朕茲用底于休成今予大賚于多方惟爾祖配之重庸勿寵褻乎具官某祖母王氏柔明惠和四德兼樹肅承先祭法度具修慶流根本有孫而顯宜荒郡壤以賁封君幽窆有聞歆茲靈渙

父延昭贈右神武軍將軍

朕荷上帝右序戒懼而不敢康乃吉巳飭躬齋明親見太時欽惟三后之德對越在天孝思感孚髣髴如接肆

予畢饗人神祇歡溥天無垠胥蒙祉福矧吾左右侍臣之良持國大計肅雍顯相而有夙夜之勤夫豈不懷先正之烈乎具官某父某器資沈銳挺然許國遭時右文老于環衛慶祥回復實在哲嗣夫急人之賢者則必推其世欲生之榮者則必澤其亡進率六軍以華有列下泉雖闕寵數其膺

三司使田況妻富氏翰林學士承旨王拱辰妻薛氏並追封樂安郡君制

朕以歲卜習祥天元錯事粢盛蠲吉璧玉華光擁神之

釐既以寵侍從之雋攷典之舊則又旌室家之賢以爾具官某妻某氏法度雍和言容靚順實生貴緒而佩結褵之勤迺儀名門而飭采繁之奉彛從禁路之陟已侈郡田之封越熙禋壇載裂腴壤思懋爾止合孚于休

丁憂人邵亢亡母劉氏追封孝感縣太君制

夫治朝之臣得推恩于其先者然匪予發大號于天下則莫繇焉今爾子願上一秩欲追榮于母阡朕惟亢儒館之彥邁家難凶夫豈拘以常文哉其澤孝感以封之時惟爾有子之慶

皇姪宗望故新婦張氏追封永嘉郡太夫人制

朕隆骨肉之恩維寵以厚其存愍以飾其終親親之意備矣爾德儀柔穆歸我公族賦命之嗇芳華遽萎特徵名郡之腴以正小君之號淑魂未昧詔榮于幽

宗女殿直邢遵貺妻趙氏等封縣君制

毓于公邸歸以德門能修婦道之嚴自表閨風之穆屬予誕慶舉于大宗持推疏邑之封庸獎宜家之範勉修柔嫕以荷褒榮

宗室令襄等新婦劉氏等封縣君制

慶源有稟禮範無違配我宗英藹然婦順屬誕辰之敷澤閱親邸之騰文宜徹縣田益華屬籍勉循柔履往荷榮章

御侍張氏周氏進封延安郡君尚服翁氏宮正張氏進封安定郡夫人制

古者天子之九御皆選用良家以聽天下之內治今因勞加命所以旌賢德之茂以爾名閥之英儀于近掖燕婉夙夜相予憂勤宜疏望郡之腴以侈封君之沐

翁氏張氏

云以正小君之號箴圖是鑒思荷寵掖

尚服廣平郡夫人宋氏進封祁國夫人制

朕選美德以充禁庭設內職以輔陰教矧小君之位實參嚴近之防若大國之錫蓋昭名數之異以爾某氏言容靚順法度雍穆入侍宸幄之邃協宣嬪掖之則宜侈封于名壤更旌禮于象服其勉柔嫕以懷寵休

真宗皇帝乳母故秦國肅明賢順夫人劉氏追封

齊魯國肅明賢順夫人制

朕惟孝子念親之無窮因思先朝保母之尊至于勤劬今寵名之未稱朕用惻然某氏本慈和之風有推就之

力早儀禁掖之望歛先朝露之零固已按圖而徹名封崇號以旌美德然奉先興孝迹舊報勞更衍二國之腴庸煥九原之宥柔魂雖闕卹典維新

皇帝乳母故魏國肅成賢穆夫人許氏追封吳越

國肅成賢穆夫人制

夫德之必報者古訓之上往而加卹者朝典之隆非旌擁傅之慈靡極寵休之遇故夫人許氏履柔明之行流端靖之風推就保于眇躬箴圖儀于內掖奮嗟淑範早闕幽局雖啓鉅邦之封兼崇美德之號朕惟鞠右之功

大臨纂之慶長更徹二國之疆加飭小君之祿懷恩惟
舊疊煥非倫

皇帝乳母韓國賢和佑聖夫人林氏進封秦晉國
永壽佑聖夫人制

朕昔在幼冲惟夫人左右保阿肆予之主大器厥功茂
焉朕惟夫人名數之未稱茲用合二國之封崇永壽之
號以褒大爾傅母之慈其享德樂康以膺予之異寵

俞氏母追封趙郡太君朱氏母追封洛陽縣太君
制

女德之賢參列後宮之職母慈之念永惟昊天之恩露
言甫聞加恤庸厚某母某氏生本茂族嬪于令門日親
圖史之言時潔烝嘗之奉賦命不淑早嗟春露之濡刻
章之榮再啓腴田之廣
朱氏母云宜
縣田之廣
慰深近掖寵極幽
局

吏部尚書陳執中姊陳氏封安康郡太君制

朕以吉已景至陟后在天而孝德孚于寓內時予股肱
元老承邦之釐思及其近親庸勿遂其美乎具官某姊
某氏德儀粹恭慶壽遐茂服勤蘋藻之事作鑿圖史之

迹維爾介弟侍祠熙成願還中壺之澤推廣同氣之愛望郡之沐以侈封君綸闈下書光賁爾族

內侍省高班周宏妻林氏封福昌縣君制

本以柔風飲于華緒適緣近屬之託且旌爾室之宜錫之土田賦以脂澤其服令則以承休恩

故王貽永二女縣君王氏等進封郡君制

服以柔風飲于華緒予維右弼之倚有謝昭辰之悲方錄遺于舊門宜胙封夫名郡益隆梱範以耀綸章

封百官父制

朕惟人子之義莫若奉親孝事君忠二端而已方朕大報于郊逆三神之釐凡在九州四海之衆罔不蒙澤而羣工之賢夙夜迺事思有以逮親者可不遂其美乎今予命之以寵秩以爲爾家庭之慶教忠之尚益勉于茲

封百官母制

朕惟春秋之義至于母子之相貴者其聖人篤人道之大邪朕因郊熙成嘉與外廷峻喆之士

武臣卽云內廷忠幹之士共

承茲休以爾具官某母某氏柔明溫惠四教具修有子實賢逢辰之慶今寵爾以封君亦維爾訓慈厚豈不顯

哉

封百官妻制

朕惟古者風天下之道繇夫婦始以其輔佐之德正位于內而王化之基乎具官某妻某氏賢而有行宜中饋之吉方予講大典郊見上帝惟是中外之士莫不獻力以相予于成豈非梱儀之助哉今予命之以封君其益思淑慎以保爾有家之慶

華陽集卷三十二

華陽集卷三十二

宋

王

珪

撰

冊文

昊天上帝冊文

伏以乾體純健博覆纖隱三光粹明臨照在下默定民命播生四時臣欽應靈顧皇建有極上符陽德司牧元元物登季秋躬修大報會以五氣宗祈明堂承順至尊精志孚盡降休右順維永維寧

赤帝冊文

伏以炎德乘離光明盛大氣常在夏被于南訛任養而
生靡不繁祉疇發我運赤符感精於赫會昌繼孝無極
肅霜零暮萬物報秋五室清明接神之顧鐘鼓以繹玉
幣以精既右饗之敷錫永祚

白帝冊文

伏以西方之氣金精行令主時肅殺大斂歲功黍稷既
登積之粟粟五室合饗物與志盡涼露宵隕感惻滋至
念我皇考昭配于天禮樂熙明寧神祚德以蕃庶彙以
綏烝人

仁宗皇帝加上徽號冊文

維元豐六年歲次癸亥十一月壬寅朔二日癸卯孝孫
嗣皇帝臣謹再拜稽首言曰臣伏觀古先格王莫不大
名發于前而大惠昭于後其法皆本于至公而不可易
至後世臣子又欲盡報上之道以謂君德甚盛其言不
足以包衆美于是有至郊加諫之文夫欲推事存之禮
述追遠之志則奉素享之榮號益新紀之鴻烈謀羣公
請太室洋洋乎際天接地而震顯之不亦當靈心而傳
古誼乎恭惟仁宗神文聖武明孝皇帝躬清明之資賦

神睿之略乾行施之不息仁性根于自然時乘六飛端御大器知窮八荒而不見其迹澤及萬彙而不居其功爾乃簡拔俊賢放遠邪佞宥恕刑獄懷保鰥寡賞不徇所私罰必當于理興農桑之本務緝禮樂之墜文有慘怛好生之心吏或誤入重辟必終身見斥有寬裕從諫之度言者屢進狂直必曲意見容念兵革之傷夷則不殺而服念稼穡之勤勞則罔寧于勉矧履天下之尊而持之以抑畏饗天下之富而實之以儉素輿馬不聞于游盤鐘鼓不涉于閒燕宮室無奢靡之飾器服無瓌奇

之玩加以夙夜齋臬事天之誠盡霜露怵惕念親之感深方朝廷之久安乃大革因循而聖政又新爲社稷之重計乃前定禍亂而皇嗣早立故四十二年仁恩川流涵濡薰蒸格于上下日月華風雨均四時和百穀蕃北有勅敵而不能驕西有黠羌而不能軼蟲魚遂性自安川藪之游男女潔誠更趨耕織之樂固有幽遐荒昧之俗不約而子來奇偉侷儻之瑞不期而特見者矣丕赫哉憲度鴻明聲文沛施自載籍之傳蓋未有休功盛業可加于茲也重循涼菲永念猷訓今將款清廟陟紫壇

遂受厚福以浸黎元置于此時臨彤庭發玉版上不敢
嚙祖宗之典下不敢虧人民之情如堯如舜如禹如湯
豈不高一世之聞而流萬世之聲哉爰飭上儀載揚景
鑠謹遣銀青光祿大夫守尚書左僕射兼門下侍郎上
柱國太原郡開國公食邑七千六百戶食實封二千五
百戶王珪奉玉冊玉寶加上徽號曰仁宗體天法道極
功全德神文聖武濬哲明孝皇帝恭惟明德在天臨受
徽稱維億萬年永錫嘉祉謹言

立夏國主冊文

維熙寧二年歲次己酉三月戊辰朔十四日辛巳皇帝
若曰於戲昔堯合萬邦而民風和周建列土而王業懋
若古申命蓋國家之成法也咨爾秉常迪性純一飲躬
恪虔生稟山川之靈舊傳弓鉞之賜撫有西夏尊于本
朝知事君必盡其節知守國當保其衆乃內發誠素外
孚誓言質之天地而不欺要之日月而不昧朕用稽酌
故典表顯徽實錫爾以茅土之封不爲不寵加爾以車
服之數不爲不榮涓辰旣良備物旣渥誕舉丕冊以華
一方今遣朝奉郎守尚書司封郎中上輕車都尉賜紫

華陽集 卷三十一 雜著
四王朝梧校
金魚袋劉航文思副使銀青光祿大夫檢校太子賓客
兼御史大夫騎都尉彭城縣開國伯食邑七百戶劉怵
持節冊命爾爲夏國主爲宋藩輔夫履謙順者靡不膺
長福懷驕肆者靡不蹈後虞率身和民時乃之績往欽
哉祇予一人之彝訓可不慎歟

祝文

安陵修寢殿奏告宣祖太祖太宗奉安祝文

伏以仙丘成寢歲筦流陰屬楹宇之圖新奉衣冠而移
御涓辰之吉致告維虔

奉先院慶基殿修造奏告宣祖昭憲皇后祝文

伏以靈蹕所棲作宮已久風雨所被塗茨弗完不敢不
告

景靈宮明福殿權奉安真宗章懿皇后御容祝文

伏以祕館宅神載新華構仙儀導蹕還竚靈娛有懷遺
訓之存爰及後昆之裕涓辰奉駕望漢馳思

西京應天禪院拆修太祖神御殿祭告祝文

廟刹有嚴威神所御將改新于寶置永欽奉于睟容仰
冀靈明俯垂鑒佑

壽星觀永崇殿奉安真宗御容祝文

伏以龍去鼎湖久隔衆攀之望衣留漢寢空成月出之遊屬珍館之載欣奉睟儀之如在明發孝慕永懷燕謀天地社稷太廟皇后廟奉慈廟奏告爲立皇子已賜名曙祝文

蓋聞克親九族以致萬邦之和顧以菲德奉承聖緒永念宗室之蕃思所以廣恩也迺放于大宗得濮安懿王之子爲賢又于國爲近屬今賜名曰曙旣以爲皇子不敢不告

明堂祭告在京諸神廟祝文

伏以卜秋吉序講古闢文極嚴父之孝思崇事天之美報乃涓路寢之室以象合宮之筵將迓休成或先敷薦祭告景靈宮里域真官祝文

伏以霜律戒期農疇畢務祠天神于複廟款道祀于祕宮維土有靈主幽之緯夙辭顧饗右成熙明

奏告太廟七室祝文

伏以禮崇嚴配歲薦親祠載陳備物之筵適在班常之室素秋云暮吉日維辛將事于虔先期以告

奏告天地社稷祝文

伏以總章之祠以嚴上帝之配季秋之吉以報萬物之成述稽舊文圖輯熙事飾于盡物告以先期

朝謁景靈宮行禮前二日奏告天地祝文

伏以天之右綏保有丕命三歲之報有豐斯盛禮文闕希包舉宗祀庶幾能饗豫以詔虔

朝謁景靈宮行宮內動土祭告里域真官祝文

伏以娛神之禮張幄陳庭先期度工飭以興事敢申嘉薦幾靈之安

明堂太廟皇后廟奉慈廟雅飾奉告土地祝文

伏以大饗之虔先薦清廟庀工稽事載塗載丹懼神勿寧敢肅以告

車駕出內前一日祭告在京諸神廟祝文

伏以夙講闕儀載嚴宗祀禋圭格廟齋蹕按途幽靈不遐明福來輔

明堂禮成謝永安陵永昌陵永熙陵永定陵祝文

顧以紹綏寶圖躬緝大祭九秋蠲吉五室會精鴻儀繹陳嘉應顯見惕懷先訓昭邁曠文維祚之休曷報之極

禮成謝在京諸神祝文

屬者議禮九房薦誠上帝靈顧保饗美祥降綏緝儀昭前追孝風下有懷茲助靡報不虔

朝謁太廟祭七祠祝文

恭以季秋之吉萬寶以登拜祝總章歌功清廟爰攷祀典幾要靈歆

禮成謝五嶽四瀆祝文

夫有天下者必有事天之祭祭不欲數率三歲而躬行之今宗祀明堂不得舉望秩之禮雖然禮成熙明顧匪

羣靈之所相乎有非之報維感格之

太乙宮立夏祝文

伏以館寓真游東峙國郊之勝氣迎炎律首當夏序之融敷冲式于琅函竚神光于煥幄冀昭靈監以懋化工

又

伏以行基布氣道夙覆于生民祕館延真禮實高于羣望肇啓執衡之序茂迎育物之祥祇薦潔芬昭回享顧

立冬祝文

伏以凝陰殺節嚴氣應期類祠靈宮導順寒籥困有宿

積室無流災長獲美祥永繫元造

又

茲以立冬之節土氣含收百穀用成士女嘉樂迎寒在野以美歲功四氣順興靡福不屆

西太乙宮立秋祝文

伏以星御移宮靈祠寓野屬素秋之應令臨清夜以陳科仰懷神顧之私丕錫歲成之望方祇皇序益嚮道風

又

伏以炎威徂谷涼氣在郊候素籥之臨辰瞻靈旗之寓

館遐疇真游之顧時修嘉薦之虔庶迪神休以成歲望

開汴口祭諸神并河陰縣河侯神祝文

伏以崑崙之墟靈派善下醞波東注轉漕京師歲無悍驚繫神之助

祁國長公主立木祭太歲諸神祝文

伏以王姬築館國有舊儀大庀工徒揆日興作諸神有位罔或驚虞

南郊壇祭告土地祝文

夫郊者就陽位之吉也今墓出壇壝之內非所以導善

氣將發而改瘞之維土有靈不敢不告

內中寶慈宮上梁祭告土地諸神祝文

伏以寶慈之宮肇新祕宇環柱叢倚架梁飛空惟土有神佑我嘉祉

內中東宮西位立木祭告太歲土地諸神祝文

維朕愛弟將班外朝飭工治材崇建王邸神其擁右以永緒之

又上梁祭告太歲土地諸神祝文

伏以宮城之隅大建王邸崇梁上吉將落其成維神祚

安萬祉無極

西華門修造祭告太歲土地諸神祝文

伏以王宮之隅高門有燁乘墉圖壯役事所興敢薦嘉羞庶安庶靖

又上梁祭告祝文

伏以宮城西華僞工起役諏辰之吉飛梁駕空皇居耽眈羣靈所獲肴觴饒潔敢以告神

越國長公主宅動土祭告土地祝文

近以降嬪之館烈焰挺災涓辰旣嘉庀徒具作維神主

土其擁右之

又立木祭告祝文

茲以主第之災載新厥址堂楹叢倚將以答之敢用庶羞告于神聽

又修葺畫堂立木祭告祝文

伏以降嬪之館載敞華堂厥日旣嘉庀工是作維神薦社庶落于成

大社祭告爲日交蝕祝文

維天子立社所以神地之道助生萬物也若羣陰弗寧

上薄乾行時則有譴告之異迺日食于六月之吉陰慝之作方晝而冥豈邦之政事不修抑神不能助陽宣精以致厥咎歟退自省懼未有以昭答天心茲用陳兵伐鼓于壇維神國之尊奉其應時銷沴以福于我有邦

天地社稷太廟謝雪祝文

伏以愆陽所薄嘉種弗滋懼邦事之失中感冬溫之作沴爰致精誠之禱遽蒙美應之孚更勵至顒仰醴鴻施南郊雅飾太廟八室奏告祝文

伏以廟寢之嚴風雨所薄就陽展事祓飾有儀緬瞻遺

靈不敢不告

太廟修造祭告土地祝文

伏以繹繹清廟風雨折墮涓辰庀工厥用是葺維神相事以介其休

太廟七室畢工奉安神主祝文

伏以新作廟寢有曷有榘涓辰嘉良還位神主七世之德遙觀清明既右饗之維永無極

天地社稷太廟皇后廟奉慈廟祈福祝文

蓋聞王者修飾五事以當天心故蒙天保佑陳錫無疆

今新承大統政未有以感動之也乃懷不能恭事之疾誠懼德素薄不足以奉祖宗之祀夙夜祇栗未識厥圖茲命秉政之臣庶其忠信可以接神也敢請命于上帝之靈惟念先皇帝仁孝之德宜膺祉福昇矜沖人疾病日復永保宗廟而作民主毋敢失墜

天地社稷太廟七室皇后廟奉慈廟奏告祝文

仁宗

上僊

伏以蒼生寡祐仁宗皇帝奄棄天下靡潰煩冤情何可處有國大變不敢不告

天地太廟七室皇后廟奉慈廟奏告仁宗皇帝諡

號祝文

伏以仁宗皇帝遺德餘烈蒙被天下施之無窮乃羣臣
請諡于郊曰神文聖武明孝皇帝廟號仁宗今靈几薦
稱不敢不告

天地社稷太廟皇后廟奉慈廟奏告行冊禮祝文

為將來南郊祀禮成行
皇太后皇后冊禮之意

伏以誕膺天命祇守聖圖上極母儀之承內繁婦德之
助伺嚴禋之就緒奉寶冊以揚徽祇告令期庶孚靈監

太廟七室奏告修仁宗廟室畢工祝文

伏以文考遐登七月而葬承祀萬世將食祖宗新宮既
成不敢不告

太廟修八室奏告祝文

伏以觀德之宮數離風雨涓辰庀事以繕以完顧瞻威
靈不敢不告

內中龍圖閣羣玉殿權奉安仁宗御容祝文

伏以神遊上僚天緒再周瞻言玉殿之居舊駐金輿之
蹕顧音塵之未遠幸威像之俄臨伏冀少宅靈娛垂歆

孝慕

東嶽天齊仁聖帝生日祝文

伏以靈祠在國陰化維神相沿既暮之春實紀迺生之日爰孚精意庶格順祺

又

伏以喬嶽配天靈祠在國大東作鎮生氣是司相沿季春奉祠誕日爰陳嘉薦庶達寅衷

仁宗掩皇堂奏告祝文

伏以日月易流綴衣如昨山川在望寶劍先收神遊未

遐陵工已復音容永闕心骨同摧

仁宗掩皇堂畢于陵左爲方壇上設五方神座鎮

謝墓法祝文

伏以嵩洛之野壤泉沃深維龜食之嘉兆旣宅千載之後無有騫崩敢報神休下虞芳席

景陵宮奉真廣孝兩殿修造奏告祝文

伏以原廟之嚴衣冠所在涓辰庀事載塗載茨顧瞻遺靈不敢不告

會聖宮畢工帝后御容還殿奉安祝文

伏以列祖相承永懷于皇訓仙遊來寓載廣于新宮旣考卜之協辰且飭工之就緒還迎貴御伏惕孝思

西京應天院修三聖御容殿告遷奉安祝文

伏以盛業基皇舊宅三川之勝仙遊御歛載新列祖之居旣稽卜之維良方僝工之有緒告遷之始孝慕何勝

鳳翔府上清太平宮修太宗神御畢工奉安祝文

伏以琳宮宅奧旣新寶構之成羽仗來娛載肅貞遊之奉遐瞻遺烈中惕孝思伏冀收神永安垂裕後祉

天章閣延昌殿權奉安英宗皇帝御容祝文

伏以相名山于洛宅旣兆陵園倣原廟于漢儀將遷館御潔除秘宇嚴奉晬容冀靈蹕之少安副衷情之罔極

內中修神御殿祭告太歲諸神祝文

伏以西清結宇夙瞻列聖之儀三載終喪將奉先皇之御載規舊寢爰植新楹甫迓靈休式陳嘉薦

景靈宮神御殿修造祭告土地祝文

於赫皇祖英德在天棲真元宮風雨摧剝飭工興事願庇時休

天地社稷太廟皇后廟奉慈廟奏告改元祝文

猥以眇躬紹膺丕命爰履上春之吉肇更新歷之元端授民時不敢不告以嘉祐九年改爲治平元年

萬壽觀廣愛寧華兩殿修造奏告祝文

伏以棲真有祠歲久必葺庀徒興事時日旣嘉肅遵故常敢以前告

章惠太后寶冊遷赴萬壽觀廣愛殿庫奏告祝文

日者有司以謂先王之制禮不可過請瘞神主于寢園今廟有寶冊不敢以毀宜于祠殿而奉置之不敢不告祭文

隴西郡王祭文

維皇祐二年歲次庚寅八月乙卯朔三十日甲申具官某等謹以清酌庶羞之奠祭于恭僖隴西郡王之靈惟王世胄蟬聯叢光合慶懿后膺期天發嗣聖王子帝家叔舅之盛秉旄珥貂榮無世並天庠難謀命至不競皇帝念親降輿視病舉苑之哀廢朝之聽贈衮九章葬車千乘王之始終恩禮用稱簫鼓夕鳴松檟秋勁爾酒旣清爾籩旣靖弔王之魂冥漠孰證伏惟尙饗

贈淑如董氏堂祭文

維嘉祐七年歲次壬寅十月某日皇帝遣某官致祭于故贈淑妃董氏之靈天子後宮九嬪以祇會莫我如其承有儀夕奄奪魄茫昧孰師撫有陳迹帝女之悲霜清高原雪飛差差玉杯之酌以寄遙思尚饗

攢所祭文

維嘉祐七年歲次壬寅十月某日皇帝遣某官致祭于故贈淑妃董氏之靈惟靈法度幽閒言容靖順與福之嗇文華而零紫禁宵長虞淵日薄爰將清酌庸導餘悲尚饗

贈太師定王允良堂祭文

維治平四年歲次丁未月日皇帝遣某官致祭于故太師尚書令兼中書令定王允良之靈惟王生于帝家世大而昌將牙軒軒相紉煌煌遠轡之馳中蹶用傷鳴佩不來奄塗于堂尚冀有知來顧予觴尚饗

賀詞

乾元節內中御侍以下賀詞

伏以赤符肇德氣乘九夏之初華渚流輝運啓千齡之際恭惟皇帝陛下躬行禹儉聽比堯聰撫四海以宅尊

唐三靈之薦祉妾等班塵近掖慶屬熙朝適逢誕聖之期永祝如山之算

內中御侍以下賀皇帝冬節詞

伏以漢臺謹歷測星候以觀祥嘒籥均時聽宮鳴而升煦伏惟皇帝陛下茂承天序丕覽化樞擁上帝之珍符踐三微之穀旦至明所燭煥如愛景之長睿算無窮屹若崇岡之固妾等幸參宮職獲講聖期再乘一氣之萌率罄九宸之祝

又

伏以陽生漢殿合雋士之八能瑞載魯臺備祥雲之五物恭惟皇帝陛下堯聰天發禹化神敷深拱蠖濩之居獨觀昭曠之道水泉初動方建統于天元霜露所霑率薦休于邦祚妾等早塵近掖過奉明恩逢嘉節之載新浹柔悰而共抃

又

伏以玉琯旋宮肇應新陽之復珠躔合度密符寶歷之觀恭惟皇帝陛下聖德廣施神聰濬發紹美百王之度留精萬務之微景福來同如大川之方至皇明所燭與

愛日以偕長妾等早沐宸憐並塵禁侍逢三正之首序
率羣抃之一情

內中御侍以下賀太皇太后冬節詞

伏以漢殿迎陽合八能于嘉奏魯臺候景書五物之珍
符恭惟太皇太后殿下陰教內敷坤儀四靜功施宗社
力保三朝之安尊極宮闈親承四海之養載履景長之
候益迎時曼之休妾等早荷慈憐幸塵近御屬薦祥于
令旦率會抃于柔悰

內中御侍以下賀皇太后冬節詞

伏以五緯連珠合太初之作歷一陽復筦首三統以爲
元恭惟皇太后殿下坤載靜符天鍾慈度以輔佐之德
大陰教于先朝以擁全之功正母儀于當極屬景長之
嘉序宜神錫之多祥妾等早邁盛期獲塵近侍咸被至
仁之覆靡勝羣抃之情

又

伏以清臺候歷肇推三統之元緹室飛灰潛應一陽之
動恭惟皇太后殿下天慈廣被坤道內寧尊臨長樂之
嚴已光于慈訓養極九州之富未盡于孝心適迎至景

華陽集 卷三十一
之長宜擁來釐之固妾等夙逢昌會獲點近聯荷仁覆
之素深率抃情之靡旣

內中御侍以下賀南郊禮畢詞

伏以玉筦升和適履天元之日紫宮肇祀躬修郊見之
儀慶屬熙朝歡交浹寓鴻惟皇帝陛下體膺乾命稽古
凝猷振前代之闕文秩百神之遺饗臨裸怵惕明發念
親之懷欽柴配黎順成反物之報上靈昭答萬祉來同
妾等早被宸暉並參禁侍聞甫班于大號集羣抃于柔
衷

華陽集卷三十三

宋

王

珪

撰

問

擬問賢良方正策

皇帝若曰自昔欲治之主曷嘗不進圖材賢以共天下之務哉終之名發事施以傳休于無窮朕甚慕之近代設策士之科而失取人之實所問或非要而所言未必有合至使遷忠憤之極論角靡曼之虛文情鬱事遼上下相失曾何大道之補焉朕享國之日淺永維任大而

守重欲聞讜直之言以鑒戒遠而未始云獲子大尺褒
然應書其攷于古而不迂質諸當今而易行爲朕竭思
而茂明之夫天人之際災祥各緣類而至也故至治之
時必有休符發爲星辰雨露草木鳥蟲之祥皇極之不
建乃六沴並下害于爾民君人者儻不思復大變則遂
至諄謬而不可扶持此皆前世已然之效也朕卽位以
來非有歌鐘狗馬之娛與夫外家女寵爵位賞賜之過
也迺二月乙巳大風晝冥四月丁未白氣起西方七月
丁丑太白晝經天八月庚寅大雨霪京師半年之間鉅

異四發豈朕不共不忱不決不達之致歟是以夙夜顧
省厥違之靡寧也矧今吏治之未醇民風之未厚官溢
而濫入之源未塞兵衆而選用之法未精工作淫巧于
都中豪右僭侈于公上田野雖加闢而農有寒飢之患
關市雖弛禁而商無賈貨之通豈不欲人蹈名節而廉
恥常不立豈不欲人遠刑罰而抵冒常不止將以六正
八疵察跡夫忠邪之端則悼不能以情見以七教三法
化陶乎善惡之類則患不能以家撫來遠臨人節禮曷
爲異同之論生利事神保民豈無後先之指設飲于鄉

以歲行之使知有恭老悌長之節古獨以爲宜乎斂穀
于社以時發之使知有揀貧恤荒之政今獨以爲難乎
宋景一言而勝妖眚朕下罪己之詔甚祗懼也而未有
轉禍之占漢宣終世以核名實朕發責吏之書甚丁寧
也而未有飭職之應昔仲舒之推災異專治春秋之學
劉蕡之對闕失深陳社稷之計遠監百王興壞之所繇
近摹四聖功業之所就何行而適世變何修而當天心
子大夫其思銷異致祥揀弊起治之術熟之復之母懼
執事以稱朕詳延之意焉

策問

司馬遷之爲學博矣然班固譏之以爲上下數十年間
多所牴牾是非頗謬于聖人方遷之時尚書孔氏詩毛
氏傳者猶未盛戰國之史又爲秦所焚滅而諸子說客
各自著書其言古事往往增損以就一時之說遷博觀
而兼採之宜其有不合也今夫學者上觀堯舜三代下
及秦漢以攷聖賢之遺跡固知遷之書有不合將索其
所以異于詩書春秋與戰國之載著其得失使史記得
爲完書以信班氏之譏然則可槩舉之乎

議

仁宗謚號議

臣伏奉敕命以七月二十九日集官于南郊壇告天請到
大行皇帝謚曰神文聖武明孝皇帝差臣撰謚及廟號
文者臣謹上議曰臣聞元精磅礴濟萬物而不昭其迹
者薦名曰天至德汪洋澤萬世而不有其功者建謚于
帝伏思在昔帝王生膺大名終紀大行使金聲而玉振
之以詒乎無窮之聞者帝莫盛于堯舜王莫隆于禹湯
也蓋易名之典下不得誅上古者將爲至尊之謚必

質于郊然後定之茲所以推天下之至美明天下之至
公雖天子不得以自專也洪惟大行皇帝躬上主之姿
承累聖之序流大漢之愷悌履放勳之欽明包富有之
業而能守以約攬泰定之勢而弗恃以安固嘗邈然究
視所未形俛焉積思所不及謂天命之匪易乃嚴恭戒
懼庶以答靈心之顧謂民懷之靡常乃涵容煦沫庶以
陶善類之歸智括萬物而不可測恩滲四垠而不可形
如兩儀之無不幬載如三辰之無不臨燭于時修廢官
繼絕世禮高年勸力稽減常賦抑末游虛己以遇豪俊

之才降志以從忠直之諫振立賞罰而權衡之章昭典
禮而黼黻之宥恕刑獄而蕩滌之惠哀困窮而衣食之
人情莫不欲逸愛其力而不勞人情莫不欲壽輔其生
而不傷羣公庶尹罔弗夷正相與謀王之朝殊鄰絕區
罔弗億寧相與慕王之境父父子子兄兄弟弟罔弗順
祇相與立王之塗蓋仁政之施沛然其若是莫之能禦
也矧夫耕藉于千畝之田祿祭于先王之廟報天之誠
篤則八奠于園丘嚴父之志盡則再脩于明堂宗室旣
蕃則廣諸分玉之愛邦統未昭則豫有主器之屬下議

樂之詔以攷鍾石之和置寫書之官以緝經墳之學邇
英敷席圖講藝也凝幾校字資味道也藻思粹發窮聖
作也飛豪灑落肆天縱也知聲色之靡伐于德義于是
乎屏燕飲之娛知雉兔之獲殫于精神于是乎絕盤遊
之欲念組織之勤則卻服御之華念土木之費則損宮
室之麗西羌阻命不欲久戍勞師而遂納玉關之誓南
蠻肆姦不欲深入討除而自致藁街之戮時則有隃沙
軼漠卓犖之貢委應圖合牒沕瀉之瑞叢四十二年于
茲可謂海內大治矣竊迹羲皇之前復乎莫索其詳自

詩書之載未有如茲之盛者也方將勒鴻休受永祐豈
 圖神機歛厭邦釁上延仙鼎已成不返荆山之御玉衣
 雖在空陳渭水之遊嘉原既新同軌畢至下華蓋于北
 極引龍輶之西巡此萬國所以摧心三靈為之變色有
 司由是飭舊典冊丕稱案稱一本皇哉邈乎錄邈一本幾
 有以綏王靈而炳帝烈也謹按謚法治民無為曰神經
 緯天地曰文通達先知曰聖保大定功曰武照臨四方
 曰明慈惠愛親曰孝若乃羣生嗷嗷鼓之舞之不知至
 化之所自然非至神乎制作禮樂際天接地煥然而大

備非至文乎永惟宗廟之奉實發先識以建大本非至
 聖乎戴白之老不識兵革之警非至武乎遐末荒昧之
 情格于聰明而無所遺非至明乎惇敘九族以述夫祖
 先之志非至孝乎粵廟號之建尚矣惟其歷古聖賢之
 君莫不極所以尊明令顯之稱又或至于代相襲之夫
 仁者聖人之盛德豈獨未有以當之耶抑當時鴻儒鉅
 學反畧于稽求抑又天之所啓期以克配大行之廟乎
 詩云維天之命於穆不已此之謂歟惟功以創業為祖
 德以守成為宗皆尊尊之大義也大行皇帝尊謚宜天

錫之曰神文聖武明孝皇帝廟曰仁宗謹議

廟祭與忌日同請不去樂及加牲香議

准中書批送下太常禮院狀太常博士秘閣校理裴煜奏大祠天地日月社稷其行禮日與國忌同者自慶歷至嘉祐凡八祀皆援太常新禮天禧二年六月十七日立秋祀白帝以文懿皇后忌同樂備而不作伏緣忌日必哀志有所至其不有樂宜也然樂所以降格神祇非以適一己之私也在禮固不可闕謹按開元中禮部建言忌日享廟應用樂裴寬自以情立議廟尊忌卑則作

樂廟卑忌尊則樂備而不奏中書令張說以寬議爲是宗廟如此其天地日月社稷用樂明矣臣愚以爲凡大祀天地日月社稷與忌同者伏請用樂其在宗廟如寬之議所冀畧輕存重不失其稱又五方及感生帝皆大祀其從祀牲用羊一豕一禘祭正位從祀一百九有七三牲用羊二豕二釋奠雖曰中祀至聖文宣王配位從祀九十有三昭烈武成王配位從祀七十有五牲用羊二豕一割割殆不徧足臣謂宜度大祀中祀從祀之位其以差加之又立夏祀赤帝竊見祝版御所自署其恭

且嚴如是諸祠而太府寺所供香殊爲尠不稱崇祀之意本院據禮云君子有終身之憂而無一日之患謂忌日也忌日不樂謂不舉吉事也然而禮令卽無忌日享廟廢樂之文至唐始有祭與忌日同則懸而不樂裴寬建議廟尊忌卑則作樂廟卑忌尊則樂備而不奏當時雖從寬議亦無典據臣等按禮家之說祭天以烟爲歆神之始以血爲陳饌之始宗廟以灌爲歆神之始以腥爲陳饌之始然則天地宗廟皆以樂爲致神之始故曰大祭有三如

謂此也天地之間虛豁而不見其形狀者陽也鬼神居天地之間不可以人道接也聲屬于陽故樂之音聲號召于天地之間庶幾神明聞之因而來格故祭必求諸陽商人之祭先奏樂以求神先求于陽也次灌地求神于陰達于淵泉也周人尙臭四時之祭灌地以求神先求諸陰也然則天神地祇人鬼之祀不可去樂明矣今七廟連室每遇薦享作樂難分廟忌之尊卑欲依唐舊制及國朝故事廟祭與忌同日並懸而不作其與別廟諸后忌同者作之若祀天地日月九宮太一及禘百神

並請作樂社稷以下諸祠既卑于廟則樂可不作如此則雖不能純用三代之禮亦可廣孝思之至祀五方感生帝禘百神釋奠文宣武成從祀者衆其用牲既少俎實幾不能充宜加五方感生帝羊二豕二百神羊五豕五文宣武成羊三豕三中祠小祠太府寺所供香大祠宜視中祠之半中祠宜視小祠之半諸大祠降御封香並請如祀昊天上帝之禮臣某等議社稷國之所尊其祀日若與別廟諸后忌同請不去樂餘並如禮官所議

濮安懿王典禮議

今月某日中書批送到門下侍郎兼兵部尚書同門下平章事昭文館大學士監修國史韓琦等狀奏伏以出于天性之謂親緣于人情之謂禮雖以義制事因時適宜而親必主于恩禮不忘其本此古今不易之常道也伏惟皇帝陛下奮乾之健乘離之明擁天地神靈之休荷祖宗社稷之重卽位以來仁施澤浹九族既睦萬國交歡而濮安懿王德盛位隆宜有尊禮陛下受命先帝躬承聖統顧以大義厚其私恩慎之重之事不輕發臣等忝備宰弼實聞國論謂攷古約禮因宜稱情使有隆

恩而廣愛庶幾上以彰孝治下以厚民風臣等伏請下有司議濮安懿王及譙國太夫人王氏襄國太夫人韓氏仙遊縣君任氏合行典禮詳處其當以時施行謹具狀奏聞伏候勅旨治平元年五月二十八日進呈奉聖旨候過仁宗皇帝大祥別取旨治平二年四月九日再進呈奉聖旨送太常禮院與兩制待制以上同共詳定聞奏臣等謹按儀禮喪服爲人後者傳曰何以三年也受重者必以尊服服之爲所後者祖父母妻妻之父母昆弟昆弟之子若子若子者言皆如親子也又爲人後

者爲其父母報傳曰何以期也不貳斬也何以不貳斬也特重于大宗者降其小宗也又爲人後者爲其昆弟傳曰何以大功也爲人後者降其昆弟也以此觀之爲人後者謂之子不敢復顧私親聖人制禮尊無二上若恭愛之心分施于彼則不能專壹于此故也是以秦漢以來帝王有自旁支入承大統者或推父母以爲帝后皆見非常時取譏後世臣等不敢引以爲聖朝法況前代入繼者多宮車晏駕之後援立之策或出母后或出臣下非如仁宗皇帝年齡未衰深維宗廟之重祇承天

地之意于宗室衆多之中簡拔聖明授以大業陛下親爲先帝之子然後繼體承祧光有天下濮安懿王雖于陛下有天性之親顧復之恩然陛下所以負宸端冕富有四海子子孫孫萬世相承者皆先帝之德也臣等愚淺不達古今竊以爲今日所以崇奉濮安懿王典禮宜準先朝封贈期親尊屬故事高官大國極其尊榮譙國太夫人襄國太夫人仙遊縣君亦改封大國太夫人攷之古今實爲宜稱臣等謹議

濮安懿王合稱皇伯議

准敕右僕射兼門下侍郎平章事韓琦等奏准內降翰林學士王某等奏崇奉濮安懿王典禮宜準先朝封贈期親尊屬故事高官大國極其尊榮譙國太夫人襄國太夫人仙遊縣君亦改封大國太夫人攷之古今實爲宜稱臣等伏詳王某等所奏未見議定聞奏候敕旨牒奏敕依奏右謹具如前臣等參詳真宗大中祥符八年楚王元佐以皇兄詔書不名仁宗卽位涇王元儼以皇叔贊拜不名天聖五年加詔書不名此國朝崇奉親屬故事今濮安懿王于仁宗皇帝其屬爲兄于皇帝合稱

皇伯而不名臣等謹議

又

濮王手詔近中書門下奏下尚書集官議濮安懿王合
行典禮如聞論議不一宜權罷集議當令有司更博求
典故庶合禮經臣等再上議曰竊以爲父母天下莫隆
焉至于繼大宗則殺其服何也大宗之統不可絕而父
母有嫡長之奉也視其服紀之隆殺而知聖人制禮之
意也知名之不可以貳也名也者天下之辨也所以別
嫌明微而不可以不慎也爲父母報云者記禮者之文

其勢然也不可云爲叔伯報也律令亦猶是也漢宣于
昭帝爲孫光武于平帝爲祖容可以稱其父爲皇考然
議者咸以爲非何也謂其以小宗而合大宗之統也陛
下旣稱仁宗皇帝爲皇考又欲稱濮安懿王爲皇考則
是兩統而又二父也又重于漢之失也非所以嚴宗廟
也非聖人制禮之意也爾雅父之昆弟先生爲世父後
生爲叔父國朝之制伯叔兄弟子姪皆加皇字今濮安
懿王子仁宗皇帝爲先生則陛下亦宜依爾雅及國朝
故事稱皇伯而不名如前議爲便至于漢之稱皇考稱

帝稱皇立寢廟序昭穆皆非陛下聖朝之所法今以儀禮及漢儒論議魏明帝詔凡五篇其間議有是非事有當否惟陛下裁處之大抵祖儀禮者爲合乎經也臣等謹議

斷范亦顏論追尊濮安懿王是非議

臣伏奉聖旨看詳范亦顏文字斷其是非以聞者臣謹上議曰竊以兩統而二父不可以正天地之大倫也先皇帝終喪三年始詔羣臣博求追尊濮安懿王故事而羣臣據儀禮喪服先皇帝雖懷本生之愛而迫天下大

義卒用羣臣議建園廟于永安令王之子歲時主其祭祀而不易其始封之國此豈不安于禮乎今亦顏言陛下擢前論事者呂誨等是暴先帝之過舉而自取美名其于子道豈小缺哉臣觀先帝初未嘗有追尊濮王名號之意方仁宗喪未除宰相已有請于朝其後誨等爭言不可用定陶共皇故事而紕之天下皆罪在宰相而知非先帝初意也夫先帝所未嘗用今知其材而用之先帝所嘗用後或得罪而去之是皆以爲不孝乎此亦顏之姦言欲以搖惑陛下之聽也亦顏又言舜禹皆受

禪舜不郊其父而禹郊之湯武皆受命湯不追王三世而武王追王之伊尹周公皆攝政太甲不以天子禮樂賜伊尹而成王于周公賜之臣以謂舜禹之受禪湯武之受命伊尹周公之攝政豈有繼承統序之事如先帝之時此非所引也亦顏又言言者只知漢而不知三代只知師丹而不知中庸臣以謂言者之據援儀禮三代之禮也中庸曰非天子不得議禮是天子可得而議也然儀禮之變須反經而合諸道兩統而二父則不可以議也此非所引也亦顏之所引固不足以論其是非也

伏惟皇帝陛下天縱聰明博通古今知仁宗所以託先帝之重推而上則祖宗之大統名不可以貳也推而下則子子孫孫萬世相承德不可以忘也亦顏之言雖知不足以惑聖聰然中外已皆聞之誠恐苟有附其說者則天下議論又將沸騰而不可止其言先帝被辱無窮陛下之缺子道皆大不道願正其罪而誅之臣謹議

請權罷臘享議

同知太常禮院呂夏卿狀古者新君踐阼之三年先君之喪二十七月爲禫祭然新主祔廟特行禫祭是禫之

始冬十月行禘祭明年又行禘祭自此五年再為禘禘
喪除必有禘禘者為再大祭之本也今當禘祭緣陛下
未終三年之制納有司之說十月依舊時享然享廟禘
祭其禮不同故事郊享之年遇禘未嘗權罷臘祭是則
孟享與享廟嘗併行于季冬矣其禘禘年數乞一依太
常禮院請今年十月行禘祭明年四月行禘祭仍如夏
卿議權罷今年臘享

謚號當先告天議

臣謹按曾子問曰賤不誄貴幼不誄長禮也唯天子稱

天以誄之春秋公羊說讀誄制謚于南郊若云受之于
天然乾興元年夏既定真宗皇帝謚其秋始告天子園
丘史臣以為天子之謚當集中書門下御史臺五品以
上尚書省四品以上諸司三品以上于南郊告天議定
然後連奏以聞近制惟詞臣撰議即降詔命庶僚不得
參聞頗違稱天之義臣今擬上先帝尊謚欲望明詔有
司稽詳舊典先之郊而後下臣之議庶先帝之茂德休
烈有以信萬世之傳

服除躬行郊廟議

按王制喪三年不祭惟祭天地社稷爲越紼而行事傳謂不敢以卑廢尊也是則居喪而可得見天地也春秋僖公三十三年傳凡君薨卒哭而祔祔而作主特祀于主烝嘗禘于廟杜預以爲新主既特祀于寢則宗廟四時常祀自當如舊是則居喪而可得見宗廟也周公稱商高宗諒闇三年不言子張疑之以問仲尼仲尼答云何必高宗古人皆然高宗不云服喪三年而云諒闇三年者杜預又謂古者天子諸侯三年之喪既葬而服除諒闇以居心喪不與士庶同禮也然則服除之後郊廟

之祭可勿舉乎南齊以前代人君嗣位或仍前郊之年或別自爲郊下有司議而王儉乃援晉宋以來皆改元卽郊而不用前郊之年又自漢文以來皆卽位而謁廟至唐德宗以後亦踰年而行郊況本朝景德二年真宗居明德皇太后之喪既易月而服除明年遂享太廟而合祀天地于圜丘臣等請皇帝將來冬至躬行郊廟之禮其服冕車輅儀物音樂緣飾事者皆不可廢

真宗雩祀配議

翰林學士王珪等言殿中侍御史趙鼎奏唐故事已有

遞遷之典最足攷驗臣復請遞遷真宗配孟夏雩祀以太宗專配上帝祈穀孟冬神州地祇循用有唐故事如此則烈聖參侑對越于昊天厚澤流光垂裕于萬祀臣珪等按祀典天地大祭有七皆襲用歷代故事以始封受命創業之君配神作主至于明堂之祭用古嚴父之道配以近考故朝廷在真宗則以太宗配在仁宗則以真宗配今則以仁宗配方仁宗始以真宗配明堂罷太宗之配而太宗先已配祈穀雩祀神州地祇本非遞遷今明堂旣用嚴父之道則真宗配天之祭當罷難議更分雩祀之配詔從珪等之議

仁宗配享議

治平元年辛酉詔以仁宗配享明堂初禮院奏乞與兩制同議仁宗配享何祭翰林學士王珪等議代宗卽位用禮儀使杜鴻漸等議季秋大饗明堂以考肅宗配昊天上帝德宗卽位亦以考代宗配王經郊祀錄注云卽孝經周公嚴父之道當以仁宗配享明堂

太祖配享議

嘉祐六年諫官楊畋論水災由郊廟未順禮院亦言對

越天地神無二主皇祐初三聖並侑後復迭配未幾復並侑頗違經典請下兩制議學士王珪等曰推尊以享帝義之至也然尊尊不可以瀆故郊無二主今三后並侑欲以致孝也而適所以瀆乎享帝非所以寧神也請如禮官議七年正月詔南郊以太祖定配

陵寢議

范鎮奏聞大行皇帝受命寶及沿寶法物與平生衣服器用皆欲舉而葬之恐非所以稱大行皇帝恭儉之意詔檢討官尋典故及兩制禮官詳議學士王珪等奏曰

受命寶者猶昔傳國璽也宜爲天子傳器不當改作古者藏先王衣服于廟寢至于平生器玩則前世不皆納于窆中亦不盡陳于陵寢今宜省約以稱先王恭儉之實

華陽集

卷三十三

吳舒帷校

華陽集卷三十三



程